



## Concerts dil CHOR SURSELVA 2020

Gest diesch onns eisi, ch'il CHOR SURSELVA ha concertau ensemen cun la band CLAMÜR. Il program cun canzuns talianas ei aunc en buna memoria. Quella ga lein nus far ensemen musica latinamericana. Il text latin dils temas religios possibilitescha in access sempel, senza stuer sefatschentar cun in lungatg jester.

Nus lein schar fascinar dalla musica plein veta e temperament sidamerican cumbinada cun ritmus da jazz. Igl accumpignament dalla band CLAMÜR procura per il sustegn ritmic e las colurs tonalas variontas necessarias.

THE LATIN JAZZ MASS ei ina messa cun las parts tradiziunalas. La musica duei accentuar ils sentiments da plascher, ventira, speranza e confidanza. Ils differents ritmus sco *salsa, samba, bossa nova, rumba e tango* dattan ina gronda variaziun e moviment als texts che derivan dil temps medieval.

Il cumponist giuven Martin Völlinger ei da derivonza Tudestga, viva e lavura denton dapi in pèr onns ella Svizra Centrala. Cun sias cumposiziuns che risguardan la tradiziun e semovan ella musica moderna contonscha el ils sentiments dils auditurs, cantadurs e musicists.

Entginas parts ord il MAGNIFICAT da Bobbi Fischer duein arrundar nies concert e dar ina ulteriura colur ed investa ella musica immens reha dall'America dil Sid.